



PRAVILNIK O PRIZNANJIMA I NAGRADAMA UNIVERZITETA U SARAJEVU

Sarajevo, juli 2026. godine



Na osnovu člana 61. Zakona o visokom obrazovanju Kantona Sarajevo („Službene novine Kantona Sarajevo“, broj: 36/22 i 28/25) i člana 64. Statuta Univerziteta u Sarajevu sa pripadajućim izmjenama i dopunama, uz prethodno mišljenje Odbora za normativna pitanja Univerziteta u Sarajevu, broj: 0105-6804-2/26 od 13. 07. 2026. godine, Senat Univerziteta u Sarajevu je na 21. redovnoj sjednici održanoj 15. 07. 2026. godine, *donio*

PRAVILNIK O PRIZNANJIMA I NAGRADAMA UNIVERZITETA U SARAJEVU

I. OPĆE ODREDBE

Član 1. (Predmet)

- (1) Pravilnikom o priznanjima i nagradama Univerziteta u Sarajevu (u daljnjem tekstu: Pravilnik) uređuju se:
- a) kategorije dobitnika nagrada i priznanja,
 - b) vrste nagrada i priznanja,
 - c) uslovi za dodjelu priznanja i nagrada,
 - d) postupak dodjele, oduzimanja i opoziva priznanja i nagrada,
 - e) izgled i sadržaj priznanja i nagrada.
- (2) Pojmovi korišteni u ovome Pravilniku jednako se odnose na muški i na ženski rod.

Član 2. (Kategorije dobitnika priznanja i nagrada Univerziteta u Sarajevu)

Kategorije dobitnika priznanja i nagrada u smislu ovog pravilnika su:

- a) studenti koji su na Univerzitetu u Sarajevu uspješno okončali prvi ciklus studija, prvi i drugi ciklus studija ili integrisani studij
- b) nastavno i nenastavno osoblje, za značajan doprinos u radu i zasluge u djelatnostima Univerziteta u Sarajevu;
- c) članice i podorganizacione jedinice Univerziteta u Sarajevu;
- d) alumnisti za izuzetna dostignuća i doprinos u nastavnoj, naučnoj, umjetničkoj, kulturnoj, sportskoj i drugim djelatnostima od značaja za afirmaciju Univerziteta u Sarajevu;
- e) domaća i strana fizička i pravna lica za poseban doprinos promociji, razvoju i afirmaciji Univerziteta u Sarajevu.

II. VRSTE NAGRADA I PRIZNANJA

Član 3. (Zlatna značka)

- (1) Zlatna značka dodjeljuje se studentu Univerziteta u Sarajevu koji je u redovnom/zakonom predviđenom trajanju odgovarajućeg ciklusa studija ispunio sve obaveze i odbranio završni rad, ako postoji obaveza izrade i odbrane završnog rada, te ostvario izuzetan uspjeh na studiju sa:

- a) prosječnom ocjenom iz svih položenih ispita u toku prvog ciklusa studija na Univerzitetu u Sarajevu od 9,50 do 10,00 (devet i pedeset do deset), pri čemu je student obaveze iz studijskog programa ispunio do 30. septembra tekuće kalendarske godine;
 - b) prosječnom ocjenom iz svih položenih ispita u toku integrisanog studija na Univerzitetu u Sarajevu od 9,50 do 10,00 (devet i pedeset do deset), pri čemu je student obaveze iz studijskog programa ispunio do 30. septembra tekuće kalendarske godine;
 - c) prosječnom kumulativnom ocjenom iz svih položenih ispita u toku prvog i drugog ciklusa studija na Univerzitetu u Sarajevu od 9,50 do 10,00 (devet i pedeset do deset), pri čemu je student sve obaveze iz studijskog programa drugog ciklusa studija, izuzev odbrane završnog rada, ispunio do 30. septembra tekuće kalendarske godine, a završni rad odbranio do 1. novembra tekuće kalendarske godine.
- (2) Izuzetno od odredbe stava (1) ovog člana, zlatna značka može se dodijeliti studentu kojem su mirovala prava i obaveze do godinu dana od dana sticanja prava na mirovanje, iz opravdanih razloga utvrđenih Statutom i aktima Univerziteta u Sarajevu, a koji ispunjava uslove u pogledu prosječne ocjene iz stava (1) ovog člana.
- (3) Izuzetno od odredbe stava (1) ovog člana, zlatna značka može se dodijeliti studentu koji je ostvario studentsku mobilnost ili razmjenu u okviru priznatih međunarodnih programa, a koji ispunjava uslove u pogledu prosječne ocjene iz stava (1) ovog člana.
- (4) U slučajevima iz stavova (2) i (3) ovog člana, Odbor za dodjelu univerzitetskih priznanja Univerziteta u Sarajevu (u daljem tekstu: Odbor) utvrđuje ispunjenost opravdanih razloga i ocjenjuje ispunjenost uslova, te Senatu Univerziteta u Sarajevu dostavlja obrazloženi prijedlog za dodjelu priznanja.

Član 4.

(Srebrna značka)

- (1) Srebrna značka dodjeljuje se studentu Univerziteta u Sarajevu koji je u redovnom/zakonom predviđenom trajanju odgovarajućeg ciklusa studija ispunio sve obaveze i odbranio završni rad, ako postoji obaveza izrade i odbrane završnog rada, te ostvario uspjeh u studiju sa:
- a) prosječnom ocjenom iz svih položenih ispita u toku prvog ciklusa studija na Univerzitetu u Sarajevu od 9,00 do 9,49 (devet do devet i četrdeset devet), pri čemu je student obaveze iz studijskog programa ispunio do 30. septembra tekuće kalendarske godine;
 - b) prosječnom ocjenom iz svih položenih ispita u toku integrisanog studija na Univerzitetu u Sarajevu od 9,00 do 9,49 (devet do devet i četrdeset devet), pri čemu je student obaveze iz studijskog programa ispunio do 30. septembra tekuće kalendarske godine;
 - c) prosječnom kumulativnom ocjenom iz svih položenih ispita u toku prvog i drugog ciklusa studija na Univerzitetu u Sarajevu od 9,00 do 9,49 (devet do devet i četrdeset devet), pri čemu je student sve obaveze iz studijskog programa drugog ciklusa studija, izuzev odbrane završnog rada, ispunio do 30. septembra tekuće kalendarske godine, a završni rad odbranio do 1. novembra tekuće kalendarske godine.
- (2) Izuzetno od odredbe stava 1. ovog člana, srebrna značka može se dodijeliti studentu Univerziteta u Sarajevu kojem su mirovala prava i obaveze godinu dana iz opravdanih razloga utvrđenih Statutom i aktima Univerziteta u Sarajevu, a koji ispunjava uslove u pogledu prosječne ocjene iz stava (1) ovog člana.

- (3) Izuzetno od odredbe stava (1) ovog člana, srebrna značka može se dodijeliti studentu Univerziteta u Sarajevu koji je ostvario studentsku mobilnost ili razmjenu u okviru priznatih međunarodnih programa, a koji ispunjava uslove u pogledu prosječne ocjene iz stava (1) ovog člana.
- (4) U slučajevima iz stavova (2) i (3) ovog člana, Odbor utvrđuje ispunjenost opravdanih razloga i ocjenjuje ispunjenost uslova.

Član 5.

(Povelja Univerziteta u Sarajevu)

- (1) Povelja Univerziteta u Sarajevu dodjeljuje se studentu fakulteta, akademije ili centra Univerziteta u Sarajevu koji je ostvario najbolji uspjeh u studiju, a čija je prosječna ocjena niža od 9,00 (devet), u slučaju kada nijedan student na toj članici i u tom ciklusu studija ne ispunji uslove za dodjelu priznanja u skladu s članovima 3. i 4. ovog pravilnika.
- (2) Izuzetno od odredbe stava (1) ovog člana, povelja može se dodijeliti i studentu kojem su mirovala prava i obaveze godinu dana iz opravdanih razloga utvrđenih Statutom i aktima Univerziteta u Sarajevu.
- (3) Izuzetno od stava (1) ovog člana, povelja može se dodijeliti i studentu koji je ostvario studentsku mobilnost ili razmjenu u okviru priznatih međunarodnih programa.
- (4) U slučajevima iz stavova (2) i (3) ovog člana, Odbor utvrđuje ispunjenost opravdanih razloga i ocjenjuje ispunjenost uslova, te Senatu Univerziteta u Sarajevu dostavlja obrazloženi prijedlog za dodjelu priznanja.
- (5) Ako dva ili više studenata ispunjavaju uslove iz stava (1) ovog člana sa istim prosjekom ocjena, Odbor u izvještaju predlaže Senatu Univerziteta u Sarajevu dodjelu priznanja svim kandidatima koji ispunjavaju uslove.

Član 6.

(Medalja Univerziteta u Sarajevu)

Medalja Univerziteta u Sarajevu je priznanje koje se dodjeljuje alumnistima Univerziteta u Sarajevu i drugim pojedincima za izuzetna dostignuća i naročit doprinos afirmaciji Univerziteta, njegovih vrijednosti i ugleda u nastavnim, naučnim, umjetničkim, kulturnim, sportskim i drugim djelatnostima na domaćem i međunarodnom nivou.

Član 7.

(Plaketa Univerziteta u Sarajevu)

- (1) Plaketa Univerziteta u Sarajevu je priznanje koje se dodjeljuje za izuzetne zasluge članicama i podorganizacionim jedinicama Univerziteta u Sarajevu, članovima akademskog i naučnoistraživačkog osoblja članica i podorganizacionih jedinica Univerziteta u Sarajevu i Rektorata Univerziteta u Sarajevu, te nenastavnom osoblju, za saradnju Univerziteta u Sarajevu sa domaćim i inostranim univerzitetima i drugim institucijama, za značajan doprinos u radu ili razvoju Univerziteta u Sarajevu i visokog obrazovanja, te za izuzetna nastavna, naučna, umjetnička, kulturna i sportska dostignuća.
- (2) Plaketa Univerziteta u Sarajevu može se dodijeliti i domaćim i stranim institucijama, organizacijama ili pojedincima koji su značajno doprinijeli saradnji, razvoju, promociji ili međunarodnoj afirmaciji Univerziteta u Sarajevu.

Član 8.
(Zahvalnica Univerziteta u Sarajevu)

- (1) Zahvalnica Univerziteta u Sarajevu je priznanje koje se dodjeljuje nastavnom, naučnoistraživačkom, umjetničkoistraživačkom, umjetničkom i nenastavnom osoblju Univerziteta za poseban doprinos radu Univerziteta u Sarajevu i dugogodišnji uspješan rad.
- (2) Zahvalnica Univerziteta u Sarajevu može se dodijeliti fizičkim i pravnim licima i koji su pružili posebnu podršku ili doprinos aktivnostima Univerziteta u Sarajevu.

Član 9.
(Ambasador Univerziteta u Sarajevu)

Ambasador Univerziteta u Sarajevu je priznanje koje se dodjeljuje stranim fizičkim licima za naročit doprinos međunarodnoj promociji aktivnosti, vrijednosti i ugleda Univerziteta u Sarajevu.

Član 10.
(Nagrada za mir i progres)

Nagrada za mir i progres dodjeljuje se domaćim i stranim fizičkim i pravnim licima za izuzetan doprinos doprinos promociji mira, humanizma, dijaloga, društvenog progressa i afirmaciji Univerziteta u Sarajevu.

Član 11.
(Počasni doktorat)

- (1) Počasni doktorat je priznanje Univerziteta u Sarajevu koje se dodjeljuje istaknutim naučnicima, umjetnicima, nastavnicima i uglednim javnim djelatnicima iz Bosne i Hercegovine i inostranstva za izuzetne doprinose u razvoju nauke, umjetnosti, obrazovanja, kulture i humanosti, te za afirmaciju Univerziteta u Sarajevu i promociju njegovog ugleda.
- (2) Uslovi, postupak i kriteriji za dodjeljivanje počasnog doktorata, kao i postupak promocije, uređeni su Pravilnikom o dodjeli počasnog doktorata Univerziteta u Sarajevu.

Član 12.
(Izuzeci)

- (1) Priznanja iz članova 3., 4. i 5. ovog pravilnika ne mogu dobiti studenti Univerziteta u Sarajevu koji su u posljednjoj studijskoj godini odslušali sve predmete i stekli apsolventski status.
- (2) Izuzetno od stava (1) ovog člana, student koji je do 30. septembra tekuće akademske godine predao završni rad, a čiji je izvještaj komisije za ocjenu i odbranu završnog rada odobren na vijeću organizacione jedinice do tog datuma, smatra se studentom koji je studijske obaveze ispunio u redovnom trajanju studija, i nije obavezan upisati apsolventski staž, pod uslovom da se odbrana završnog rada organizuje do 1. novembra kalendarske godine.

III. POSTUPAK DODJELE PRIZNANJA I NAGRADA UNIVERZITETA U SARAJEVU

Član 13.

(Pokretanje postupka dodjele priznanja i nagrada)

- (1) Postupak dodjele priznanja i nagrada Univerziteta u Sarajevu pokreće se na prijedlog tijela Univerziteta u Sarajevu definiranih Statutom, vijeća fakulteta, akademija, centara, instituta i Odbora.
- (2) Prijedlog za pokretanje postupka upućuje se u pisanom obliku Odboru.

Član 14.

(Sadržaj prijedloga za dodjelu priznanja)

- (1) Prijedlog za dodjelu priznanja studentima iz člana 3. 4. i 5. ovog pravilnika obavezno sadrži:
 - a) tačno utvrđen prosjek ocjena iz svih položenih ispita na prvom ciklusu studija, kada se priznanje dodjeljuje po okončanju prvog ciklusa studija;
 - b) tačno utvrđen prosjek ocjena iz svih položenih ispita na prvom i drugom ciklusu studija, kada se priznanje dodjeljuje po okončanju drugog ciklusa studija;
 - c) tačno utvrđen prosjek ocjena iz svih položenih ispita na integrisanom studiju, kada se priznanje dodjeljuje po okončanju integrisanog studija;
 - d) potvrdu Univerzitetskog tele-informatičkog centra (UTIC) o izvršenoj provjeri ostvarenog prosjeka ocjena.
- (2) Prijedlog za dodjelu priznanja Univerziteta u Sarajevu iz članova 7. do člana 11. ovog Pravilnika, fizičkom licu obavezno sadrži:
 - a) biografiju sa osnovnim podacima o obrazovanju i profesionalnoj karijeri,
 - b) obrazloženje doprinosa na kojem se temelji prijedlog, uključujući konkretne primjere postignuća i doprinosa.
- (3) Prijedlog za dodjelu priznanja Univerziteta u Sarajevu pravnom licu obavezno sadrži:
 - a) naziv i sjedište,
 - b) djelatnost i pravni oblik organizacije,
 - c) obrazloženje doprinosa na kojem se temelji prijedlog, sa opisom saradnje i konkretnih projekata ili aktivnosti.
- (4) Prijedlog za dodjelu počasnog doktorata podnosi se u skladu sa Pravilnikom o dodjeli počasnog doktorata Univerziteta u Sarajevu.
- (5) Prijedlog za dodjelu priznanja iz članova 8. i 9. ovog pravilnika nenastavnom osoblju i bibliotekarima može podnijeti:
 - a) rektor Univerziteta u Sarajevu,
 - b) članica Univerziteta u Sarajevu u kojoj je zaposlenik angažovan,
 - c) Odbor za dodjelu priznanja i nagrada Univerziteta u Sarajevu,
 - d) rukovodilac članice.
- (6) Prijedlog iz stava (5) ovog člana obavezno sadrži:
 - a) osnovne podatke o zaposleniku (ime, prezime, radno mjesto, radni staž),
 - b) opis poslova i odgovornosti,
 - c) konkretne doprinose radu Univerziteta u Sarajevu,
 - d) obrazloženje razloga za dodjelu priznanja sa navodom specifičnih postignuća.
- (7) Članica Univerziteta u Sarajevu dužna je Odboru dostaviti prijedloge za dodjelu priznanja najkasnije do 31. oktobra tekuće kalendarske godine.

Član 15.
(Odluka Senata i izvještaj Odbora)

- (1) Senat Univerziteta u Sarajevu donosi odluku o dodjeli priznanja Univerziteta u Sarajevu na osnovu izvještaja Odbora.
- (2) Izvještaj Odbora sadrži podatke relevantne za vrstu priznanja čija se dodjela predlaže, obrazloženje razloga za dodjelu i ocjenu ispunjenosti kriterija utvrđenih ovim pravilnikom, a za počasni doktorat i u skladu sa posebnim pravilnikom kojim je uređena njegova dodjela.
- (3) Senat Univerziteta u Sarajevu može zatražiti od Odbora dodatna pojašnjenja ili dopune izvještaja prije donošenja konačne odluke.

Član 16.
(Dodjela, opoziv i oduzimanje priznanja i nagrada)

- (1) Priznanja i nagrada Univerziteta u Sarajevu uručuje rektor Univerziteta u Sarajevu na svečanosti povodom Dana Univerziteta u Sarajevu ili drugoj prigodnoj svečanosti.
- (2) Priznanje ili nagrada dodijeljeno prema ovom Pravilniku može se opozvati, odnosno oduzeti, ako se naknadno utvrdi da je priznanje dodijeljeno na osnovu neistinitih podataka ili nepravilnosti u postupku koje su bile od odlučujućeg značaja, ili ako je zadržavanje priznanja nespojivo sa zaštitom ugleda Univerziteta, ili ako je dobitnik priznanja pravomoćno osuđen za teško krivično djelo, povredu akademskog integriteta ili druge povrede koje su nespojive sa vrijednostima Univerziteta u Sarajevu.
- (3) Postupak opoziva, odnosno oduzimanja priznanja pokreće Odbor po službenoj dužnosti ili na osnovu obrazloženog prijedloga ovlaštenih predlagača iz člana 13. ovog Pravilnika.
- (4) Prije dostavljanja izvještaja Senatu Univerziteta u Sarajevu, dobitniku priznanja omogućava se izjašnjenje o relevantnim činjenicama u razumnom roku koji ne može biti kraći od 15 dana od dostavljanja poziva. Ako se dobitnik priznanja ili nagrade ne izjasni u ostavljenom roku, postupak se može okončati na osnovu raspoložive dokumentacije.
- (5) Odluku o opozivu, odnosno oduzimanju priznanja, donosi Senat Univerziteta u Sarajevu na osnovu izvještaja i prijedloga Odbora.
- (6) Odluka iz stava (5) ovog člana evidentira se u skladu sa članom 29. ovog pravilnika, a Univerzitet u Sarajevu može zahtijevati povrat fizičkog primjerka priznanja ili nagrade, ako je to primjenjivo.
- (7) Odluka o oduzimanju priznanja ili nagrade je konačna i protiv nje se ne može izjaviti žalba, a dobitnik istih može pokrenuti odgovarajući postupak pred nadležnim organom u skladu sa zakonom.

IV. IZGLED PRIZNANJA I NAGRADA UNIVERZITETA U SARAJEVU

Član 17.
(Izgled Zlatne značke)

Zlatna značka nalazi se u zlatnom ramu dimenzija 14 x 18,5 cm. Zlatni logo Univerziteta u Sarajevu prečnika 6,4 cm i pločica sa imenom i prezimenom dobitnika priznanja dimenzija 6 x 2 cm nalaze se unutar rama na platnenoj pliš pozadini tamnoplave boje.

Član 18.
(Izgled Srebrene značke)

Srebrna značka nalazi se u srebrnom ramu dimenzija 14 x 18,5 cm. Srebrni logo Univerziteta u Sarajevu prečnika 6,4 cm i pločica sa imenom i prezimenom dobitnika priznanja dimenzija 6 x 2 cm nalaze se unutar rama na platnenoj pliś pozadini tamnoplave boje.

Član 19.
(Izgled i sadržaj Povelje Univerziteta u Sarajevu)

Povelja Univerziteta u Sarajevu štampa se na 200 g papiru dimenzija 42 x 29,7 cm, a njen sadržaj čine: naziv i znak Univerziteta u Sarajevu, naziv priznanja, ime i prezime studenta, broj i datum izdavanja te potpis rektora i pečat Univerziteta u Sarajevu.

Član 20.
(Izgled i sadržaj Medalje Univerziteta u Sarajevu)

Medalja Univerziteta u Sarajevu nalazi se u ukrasnoj drvenoj obrađenoj kutiji dimenzija 15,5 x 20,5 cm. Unutar kutije na tamnoplavoj pozadini nalaze se stilizirani zlatni logo Univerziteta u Sarajevu prečnika 6,4 cm i pločica sa imenom i prezimenom dobitnika priznanja.

Član 21.
(Izgled i sadržaj Plakete Univerziteta u Sarajevu)

- (1) Plaketa Univerziteta u Sarajevu štampa se na kvalitetnom 200 g papiru dimenzija 42 x 29,7 cm, a njen sadržaj čine: naziv i znak Univerziteta u Sarajevu, naziv priznanja, ime i prezime fizičkog lica odnosno naziv pravnog lica, kratko obrazloženje iz odluke Senata Univerziteta u Sarajevu o dodjeli Plakete Univerziteta, broj i datum izdavanja te potpis rektora i pečat Univerziteta u Sarajevu.
- (2) Uz Plaketu Univerziteta u Sarajevu dodjeljuje se i prigodno obilježje reljefnog izgleda sa ugrađenim znakom Univerziteta, a sadrži naziv priznanja, ime i prezime fizičkog lica odnosno naziv pravnog lica.

Član 22.
(Izgled i sadržaj Zahvalnice Univerziteta u Sarajevu)

Zahvalnica Univerziteta u Sarajevu štampa se na kvalitetnom 200 g papiru dimenzija 42 x 29,7 cm, a njen sadržaj čine: naziv i znak Univerziteta, naziv priznanja, ime i prezime fizičkog lica odnosno naziv pravnog lica, kratko obrazloženje iz odluke Senata Univerziteta u Sarajevu o dodjeli Zahvalnice Univerziteta u Sarajevu, broj i datum izdavanja te potpis rektora i pečat Univerziteta u Sarajevu.

Član 23.
(Izgled i sadržaj priznanja Ambasador Univerziteta u Sarajevu)

Priznanje Ambasador Univerziteta u Sarajevu štampa se na kvalitetnom 200 g papiru dimenzija 42 x 29,7 cm, a njegov sadržaj čine: naziv i znak Univerziteta u Sarajevu, naziv priznanja, ime i prezime fizičkog lica, kratko obrazloženje iz odluke Senata Univerziteta u Sarajevu o dodjeli priznanja Ambasador Univerziteta u Sarajevu, broj i datum izdavanja te potpis rektora i pečat Univerziteta u Sarajevu.

Član 24.

(Izgled i sadržaj Nagrade za mir i progres Univerziteta u Sarajevu)

- (1) Nagrada za mir i progres Univerziteta u Sarajevu štampa se na kvalitetnom 200 g papiru dimenzija 59,4 x 42 cm, a njen sadržaj čine: naziv i znak Univerziteta u Sarajevu, naziv priznanja, ime i prezime fizičkog lica odnosno naziv pravnog lica, kratko obrazloženje iz odluke Senata Univerziteta u Sarajevu o dodjeli Nagrade za mir i progres Univerziteta u Sarajevu, broj i datum izdavanja te potpis rektora i pečat Univerziteta u Sarajevu.
- (2) Uz Nagradu za mir i progres Univerziteta u Sarajevu dodjeljuje se i prigodno obilježje reljefnog izgleda sa ugrađenim znakom Univerziteta u Sarajevu, a sadrži naziv priznanja, ime i prezime fizičkog lica odnosno naziv pravnog lica.

V. ODBOR ZA DODJELU UNIVERZITETSKIH PRIZNANJA UNIVERZITETA U SARAJEVU

Član 25.

(Sastav i mandat Odbora za dodjelu univerzitetskih priznanja)

- (1) Odbor imenuje Senat Univerziteta u Sarajevu u sljedećem sastavu:
 - a) rektor Univerziteta u Sarajevu,
 - b) po jedan predstavnik grupacija nauka i umjetnosti na Univerzitetu u Sarajevu, kojeg predlaže odgovarajuće vijeće grupacije nauka i umjetnosti,
 - c) predstavnik Upravnog odbora Univerziteta u Sarajevu i
 - d) predstavnik Udruženja Studentski parlament Univerziteta u Sarajevu.
- (2) Predsjednik Odbora je rektor Univerziteta u Sarajevu.
- (3) Mandat članova Odbora traje četiri godine, izuzev mandata predstavnika Udruženja Studentski parlament Univerziteta u Sarajevu čiji mandat traje jednu godinu.

Član 26.

(Nadležnost Odbora)

Nadležnost Odbora je da:

- a) razmatra prijedloge za dodjelu priznanja i nagrada, ocjenjuje ispunjenost uslova i kriterija te Senatu Univerziteta u Sarajevu predlaže dodjelu odgovarajuće vrste priznanja i nagrada,
- b) Senatu Univerziteta u Sarajevu podnosi izvještaj o realizaciji aktivnosti i prijedloge za unapređenje postupka dodjeljivanja priznanja,
- c) inicira postupke opoziva ili oduzimanja priznanja u skladu sa ovim Pravilnikom.

Član 27.

(Način rada i odlučivanja Odbora)

- (1) Odbor o pitanjima iz svoje nadležnosti odlučuje na sjednicama.
- (2) Sjednice se održavaju u pravilu jednom u semestru.
- (3) Sjednice se održavaju na mjestu određenom u pozivu za sjednicu, a po ukazanoj potrebi mogu se održati i elektronskim putem.
- (4) Sjednica Odbora može se održati ako joj prisustvuje većina od ukupnog broja članova Odbora.
- (5) Odbor donosi odluke natpolovičnom većinom ukupnog broja članova Odbora.

Član 28.
(Stručni i administrativni poslovi)

Stručne i administrativne poslove za rad Odbora i postupak dodjele priznanja i nagrada Univerziteta u Sarajevu obavlja Kabinet rektora Univerziteta u Sarajevu, a Služba za izdavačku djelatnost Univerziteta u Sarajevu obavlja poslove koji se odnose na štampanje priznanja.

Član 29.
(Evidencija odluka)

Rektorat Univerziteta u Sarajevu vodi posebnu evidenciju o dodjeljivanju priznanja i nagrada Univerziteta u Sarajevu.

VI. PRELAZNE I ZAVRŠNE ODREDBE

Član 30.
(Izmjene i dopune Pravilnika)

Izmjene i dopune ovog pravilnika donose se na način i po postupku utvrđenom za njegovo donošenje.

Član 31.
(Primjena Pravilnika)

- (1) Ovaj pravilnik stupa na snagu danom donošenja, a primjenjivat će se počev od akademske 2026/2027. godine.
- (2) Stupanjem na snagu ovog pravilnika prestaje važiti Pravilnik broj: 01-2-35-1/21 od 24. 02. 2021. godine.

REKTOR

Prof. dr. Tarik Zaimović

Broj: 01-15-58-1/26

Sarajevo, 15. 07. 2026. godine

